

浙江文叢

劉伯溫集

〔下冊〕

浙江出版聯合集團
浙江古籍出版社

浙江文叢

劉伯溫集

〔下冊〕

〔明〕劉基 著 林家驪 點校

浙江出版聯合集團
浙江古籍出版社

圖書在版編目(CIP)數據

劉伯溫集 / (明)劉基著;林家驪點校. —杭州:浙江古籍出版社, 2011. 5

ISBN 978-7-80715-630-7

I. ①劉… II. ①劉… III. ①古典詩歌—作品集—中國—明代②古典散文—作品集—中國—明代 IV. ①I214.82

中國版本圖書館 CIP 數據核字(2010)第 245779 號

劉伯溫集

(全二冊)

[明]劉基 著 林家驪 點校

出品人 胡小罕

出版發行 浙江古籍出版社

(杭州市體育場路 347 號 郵編:310006)

網址 www.zjguji.com

責任編輯 屈篤仕

封面設計 劉欣

責任校對 余宏

照排 浙江時代出版服務有限公司

印刷 浙江新華數碼印務有限公司

開本 710mm×1000mm 1/16

印張 57.75

字數 590 千


版次 2011 年 5 月第 1 版

印次 2011 年 5 月第 1 次印刷

書號 ISBN 978-7-80715-630-7

定價 240.00 圓

ISBN 978-7-80715-630-7



9 787807 156307 >

如發現印裝質量問題,影響閱讀,請與市場營銷部聯繫調換。

第二十卷 五言古詩

感懷三十一首

閑夜坐中庭，逍遙散煩襟。素月出高雲，清風來遠林。仰觀河漢流，俯聆鶻鳩吟。佇立起長歌，感嘆一何深！

驅車出門去，四顧不見人。回風卷落葉，颯颯帶沙塵。平原曠千里，莽莽盡荆榛。繁髮能幾何？憔悴及茲辰。所以芳桂枝，不爭桃李春。雲林耿幽獨，霜雪空相親。

誰云魯酒薄，邯鄲被戈矛。楚館困兩君，乃爲馬與裘。舉世共如此，太息復何尤！振衣箕山頂，引領望許由。終然不可見，涕淚交膺流。

古人盜天地，利源不可窮。今人盜農夫，歲莫山澤空。紛紛九衢內，連袖如長虹。共笑沮溺鄙，各事游冶雄。悠悠方自此，袞袞何時終！

啾啾草間雀，日隨黃鳥飛。爭先赴稻梁，寧顧野人機？便便善柔子，懷利近相依。但慕春萸好，不見秋霜霏。驅車逐走鹿，中路忘所歸。豈不愛其躬？天命與心違。古道今已矣，感寤空涕欷。

柔桑生中園，婀娜當陽春。下滋靈泉液，上承膏露津。美人望蠶月，傾筐競明晨。榮盛方及時，采捋一何頻！枯根不盈拱，何以禦霜辰？復聞芻蕘子，磨礪待爲薪。冥觀成感激，躑躅含酸辛。

無恤得尹鐸，晉陽以爲歸。馮諼勸市義，孟嘗能不危。戰國有如此，況乃商、周時。漢武任桑羊，脔剥盡膏脂。向非輪臺詔，持斧空繡衣。悠悠復何道，咄咄令人悲。

伏枕候明發，夢游滄海中。中有萬斛船，蕩漾隨天風。舵師兀^{〔一〕}昏睡，環視立衆工。波濤正洶湧，欲往迷西東。寤寐惕驚起，魂魄猶忪忪。

蘇秦佩六印，賓從何縱橫。當時機中婦，倩笑遠相迎。黃金生意氣，蠶蠅見人情。豈無簞瓢士？今爲時所輕。

種樹當中庭，不識美與惡。微陰未盈戶，枝葉猶荏弱。一朝根柢成，延蔓蔽樓閣。離披引刺蚝，蒙昧喧鳥雀。毀垣施斧斤，得喪亦相若。萬事不早謀，日暮徒駭愕。

東園多桃李，擢幹何交加。春秋互遞代，衰榮競相夸。槭槭去故物，英英發新花。花謝葉復作，空令人嘆嗟。

翡翠翔江湖，亡身爲毛羽。不如道傍李，尚得滋味苦。驅車上太行，還顧望梁甫。高岡多烈風，茂林化爲岵。空餘澗底藤，蒙龍蔓烟雨。

浮萍不依山，女蘿不移根。草木非有心，天道更何言。如何三春子，磬折隨涼溫。朝乘晉主車，暮集韓魏門。巧笑發容輝，馳騁矜愚昏。誰見陶彭澤，桑麻滿田園。

上山采幽蘭，盡日未盈手。持贈故交人，長喚不回首。蘭花豈不芬？故情豈不厚？投之非所好，良意翻成醜。

峨峨蓬萊山，渺渺大瀛水。神仙有窟宅，亦在玄黃裏。大壑多驚風，不辨龍與鯉。吹沙乘波出，洶若鯨鯢起。陽侯貫深淵，海若汨泥滓。馬御恣饒食，罔象潛譎詭。誰能報王母，弱水不可履。羲和近虞淵，日暮空已矣。

亭亭山上木，蔚蔚石底竹。諒非懷隱憂，胡爲自局促。振衣陟崇岡，高下眺原陸。鳳凰棲枯枝，稻粱肥雁鶩。春陽悅衆目，風雨愁比屋。人主各有情，豈若麋與鹿！

射干生曾崖，不識寒澗陰。池魚貫安流，寧知江海深？殷王相版築，垂名耀來今。後世重閼閱，田野多呻吟。

鰕(二)魚湧姑射，月暈滄海風。鯨鯢吐高浪，白日寒瞳矐。神仙下天闕(三)，左右翳玉虹。金盤薦麟脯，翠蕤擁青童。酣歌殷溟徼，魚鼈相噉嚼。忽然乘雲去，寥落寒江空。

朝登會稽山，逍遙望南訛。禹穴已蕪沒，禹功長不磨。惆悵感往昔，沉吟發新歌。誰言專車骨，冠弁高嵯峨。爲虺且復爾，爲蛇當奈何。天門隔虎豹，空悲涕滂沱。

結髮事遠游，逍遙觀四方。天地一何闊，山川杳茫茫。衆鳥各自飛，喬木空蒼涼。登高見萬里，懷古使心傷。佇立望浮雲，安得凌風翔！

芳樹生丹崖，綠葉如雲烟。上枝蔽光景，下根蟠九泉。朝涼聒衆鳥，夕陰萃鳴蟬。豈不盛容色，及此陽春年。西風吹白露，點綴庭階前。繁華坐銷歇，枝葉空相捐。世情多反覆，天道有推遷。金屋擅嬌寵，長門閉神仙。獻賦亦已晚，徒悲淚如泉。

我有綠綺琴，其材出空桑。金徽映玉軫，音韻鏘_(四)琳琅。上弦感薰風，下弦來鳳皇。世耳不欲聞，子期今則亡。願持獻重華，路阻川無梁。

孟軻去齊魏，賈誼之長沙。聖賢良已矣，吾道空咨嗟。徒言青松枝，不如桃李花。太息安陵子，知時爲世誇。

客有持六經，翩翩西入秦。衣冠獨異狀，談舌空輪囷。獻納竟何補？焚坑禍誰因？昂昂採芝士，矯矯蹈海人。龍驤九淵外，豈復嘆獲麟！

白壁閼頑礪，淪晦同泥沙。朽壤生夜光，見者咸驚嗟。君子分寂寞，小人互矜誇。枯瘁若秋蓬，鮮艷如春華。狂風忽簸蕩，飄落歸誰家？

大道散草澤，呻吟在康衢。蔓葛自纏繞，蘭蕙日蕭疏。雞鳴出門去，薄暮還走趨。進則蚊蟻萃，退爲失群鳥。君看拜塵友，逸氣凌東都。淒涼白首嘆，千載爲嗟吁。

象以齒自伐，馬以能受羈。猛虎恃彊力，而不衛其皮。世人任巧智，天道善盈虧。不見瑤臺死，永爲天下嗤。

槁葉寒撼撼，羅帳秋風生。淒淒候蟲鳴，唳唳賓鴻驚。美人抱瑤瑟，仰視河漢明。絲桐豈殊音？古調非今聲。沉思空幽寂，歲月已徂征。

晨登吳山上，四望長嘆嗟。借問胡嘆嗟，狹路險且邪。子胥竭忠諫，抉目爲夫差。宰嚭善逢迎，越刃復相加。守正累則多，從人禍亦奢。遭逢貴明良，不爾俱泥沙。

壺公下天闕，聊以觀世紛。賣藥汝南市，時人俱不聞。顧此非我徒，飄然乘白雲。方駕雙

虬龍，被服九霞文。但見北邙阪，嵒嶢盡高墳。

種苗甫田中，其葉何離離。上天降膏澤，溥博無偏私。人力苟不至，不如茅與茨。常恐嘉^{〔五〕}實晚，坐傷零露滋。徘徊感節序，太息秋風時。

詠史二十一首

凱風扇朱夏，草水生清涼。卧疾澹幽曠，白日悠且長。散帙觀古人，喟焉想虞唐。陽春能幾何，陰氣多繁霜。天道諒悠悠，人理亦茫茫。詠歌寄深情，歌罷增慨慷。

神樞幹元化，循環運陰陽。善惡隨氣異，禍福竟何常。朱、均繼堯、舜，時事已搶攘。至人妙轉移，靈曜回晶光。祥麟踏大野，君子徒慨慷。黃星照中原，天道遂披猖。汗漫千百年，流潦浩滂滂。否泰有傾覆，霖雨見朝陽。惜無風雨收，乘時佐義皇。熙熙返大樸，濟濟垂衣裳。鼎湖去不復，嘆息空哀傷。

野馬不羣食，彊受組與羈。低頭衡軌下，各自東西馳。秦人任法令，斬艾尊君師。六合始一家，恩愛已乖離。一旦山東客，揭^{〔六〕}竿以爲旗。叫呼驪山徒，天下響應之。素車拜軹道，誰

復爲嗟咨！

周昌勇庭諍，子房善奇謀。王陵抗高議，平、勃終安劉。經權兩不廢，道立知亦周。煌煌東都士，節義明清秋。孰知讒佞巧，舉足觸戈矛！顧此悲世運，泫然涕交流。

食毒偶不死，謂言堇可餐。墮河偶不溺，謂是天所完。侈心不自顧，利欲紛多端。百勝困一蹶，名滅軀體殘。君子戒微幸，小人樂灾患。不見瑤與羽，千載遺悲酸。

燕昭志報復，金臺求俊賢。下齊如破竹，大耻雪九泉。六王死灰人，安可與比肩？奈何驕氣盈，妄想彼神仙！安期不可致，即墨火已然。煌煌召公業，委棄如浮烟。

天狗吠梁野，七雄扇妖氛。吳徒二十萬，剽若狼虎群。鼓行破棘壁，長驅似輕雲。漢將三十六，朱旗耀天垠。救梁不奉詔，太尉真將軍。遂令千載下，知人稱孝文。哀哉潼關戰，百萬徒紛紜。

平居觀群物，紛紛爭朵頤。口舌不能勝，兵戈遂相隨。古來豪傑士，于今安所之？大運

一朝至，孰分賢與蚩！所以四老人，去采商山芝。清風扇六合，百世真吾師。

景公返雀轂，晏子稱其仁。鰥寡既有室，長年不負薪。焉知子玉節，遺禍逮天倫。推恩限目見，太息此君臣。

田橫不事漢，刎頸送咸陽。二客既穿冢，島中皆自戕。雖非中庸道，要亦有耿光。英雄久淪沒，世俗但炎涼。嗟嗟翟廷尉，慷慨令人傷。

吾聞共工臺，乃在崑崙北。長蛇戴九頭，利吻錯戈戟。呿呀恣啖食，抵厥成溪澤。嗚呼三仞沮，可以警貪得。

四七續炎運，漸臺殪狂新。建侯首褒德，拳拳念生民。富春有遺老，終竟不爲臣。遂令節義士，視身若埃塵。前車屢折軸，後駕無回輪。不有錮黨禁，何由起黃巾？爲邦貴知本，明主宜書紳。

建光悖祖德，封爵逮閭閻。忠良坐荼毒，隕涕盈道路。南巡既不返，狡窟寧久固？功成

十九侯，事已非細故。況聞用骨鯁，乃以浮陽疏。中官既世襲，山陽更嬌妒。時事亦可知，君子獨未寤。美哉吳長史，衡門掩秋露。

當途亂天紀，赤帝懸空名。寧知辟掾日，禍機已潛萌。晉主念私勞，荀馮巧相迎。撫床竟不寤，骨肉成鯁鯨。好還實天道，狙詐徒人情。

香餌獲死魚，重賞致死士。自古以爲訓，世俗寧知此？陳湯困刀筆，壯夫皆切齒。如何中興主，終竟惑薏苡！隋帝易廣勇，天命以不長。唐宗昧治格，本支竟摧戕。聖人有達節，變通亦何常。禹、湯不同跡，萬古皆明王。

永嘉昔潰亂，南渡馳五馬。長江畫天塹，九廟扇灰燧。豈無運甓人？亦有誓江者。智池不揚波，靈物棲曠野。哀哀黍離淚，空向新亭灑。

華門翳蓬蒿，窮巷絕馬跡。中有抱膝人，疏糲不充食。榮華過浮埃，敝服無愠色。獻玉鄙卞和，扣角羞甯戚。天潢不垂雲，中夜起嘆息。

吾愛閔仲叔，幽居翳茆茨。應辟思濟世，利祿豈其私？進當致堯舜，退則老蒿藜。焉能犬馬養，以爲天下嗤。

美人皎如玉，挾瑟升高堂。泠泠向長風，操作孤鳳凰。曲度未終竟，玄雲蔽穹蒼。走獸駭赴林，飛鳥號且翔。高山與流水，日莫空淒涼。

夫差卧薪日，勾踐嘗膽時。人生各有志，況乃身踐之。寧知姑蘇鹿，已與西施期。空令千載下，痛恨于鴟夷。

游仙九首

日月如過翼，瞬息春已秋。何不學神仙，縹緲凌虛游？雷霆以爲輿，虹霓以爲輶。清晨登閭風，薄暮宿不周。長嘯層城巔，濯足翠水流。俯視八極內，擾擾飛蜉蝣。今日何不樂，振策登高山。深林仰無見，藤蔓陰以繁。鼪鼯繞樹啼，黃鵠空飛翻。攬轡向西北，思欲赴崑崙。瓊樓十二重，豹虎夾陞闔。青鳥去何之，誰向王母言？徘徊歲華晚，感激生愁怨。

岐陽隱孤鳳，寰海騰蛟蛇。不食松柏實，而采日及花。翩翩柱下史，望望之流沙。麻姑何

爲者，乃降蔡經家？神龍集洿澤，取笑于魚蝦。

費生市井兒，未嘗識神仙。偶然壺中去，謂是別有天。幻化且不解，真訣安能傳？那將食色身，妄弄刑賞權！果然失符後，衆鬼不見憐。

天高河漢清，露白秋宵永。朝華炫紅芳，蟪蛄弔馳景。繁思靡志帥，內疚積心梗。涉江無方舟，汲井悲短綆。歲莫霜雪寒，泣涕沾項領。

秦皇煽雪焰，烈烈燔九州。平原曠如赭，鴻鵠安所投？所以避世士，慨想乘桴浮。樓船載振子，去作汗漫游。何必蓬萊山？遠人即瀛洲。虎視徒逐逐，竟死于沙丘。

娟娟姮娥女，灼灼芙蓉姿。一入月宮去，千秋閉蛾眉。涼風清玉除，碧雲生桂枝。鳳歌不可聽，長夜有餘悲。

晨登女床山，西北望崑崙。樓臺似霄漢，金碧氣魂魂。素女三千人，灼灼扶桑暉。鸞笙引鳳舞，雲旆隨霓旛。老童發清歌，昌容戲紫鵷。神荼獻丹桃，洪崖開玉尊。蜚廉漫崔嵬，建章

空千門。

大道久已晦，誰能識仙真？
如何賣藥翁，怪語驚市人！
日月空明照，朝菌非大椿。
已矣復何道？去去生愁辛。

感寓六首

暑退生夕涼，褰衣步微月。
風來竹陰動，草暗螢光發。
佇立忽懷人，江河渺難越。

庭前金鳳花，向晚爭媚嫵。
但見白露滋，豈知繁霜苦！
芳時良可惜，此物何足數。

白露下木葉，淒涼江海秋。
江皋有鳴雁，嗷嗷安所求？
稻粱日蕭索，風雨徒離憂。

一日復一夕，一夕復一朝。
青燈向暗壁，光焰坐自消。
韓鷹鍛六翮，絕意于雲霄。

嚴霜隕奧草，蛇虺去所依。
可惜蕙蘭花，與之共頹萎。
顧此悲世運，泫然涕交頤。

淒淒素秋霜，萋萋高原草。運窮相值遇，黜顏就枯槁。浩嘆《采薇》歌，慚愧商山老。

招隱五首

浮景無根株，逝川不可留。昨日瑤草春，今朝蓬梗秋。鼎食豈不美？鳩毒潛戈矛。華軒豈不貴？長路能摧輶。子胥棄吳江，屈原赴湘流。韓、彭竟菹醢，蕭、樊亦累囚。何如張子房，脫屣萬戶侯。深韜《黃石略》，去從赤松游。

秦皇火六籍，黃綺之商山。漢帝握乾符，羊裘竟不還。古來遁世士，冥心丘壑間。于時苟無用，安事空摧顏！石泉清以芳，白雲寒更閑。春蔬雜甘辛，秋果羅青殷。濁酒晚自酌，柴扉晝恒關。嘯歌陟崇岡，濯足臨潺湲。金馬我何榮，羊腸我何艱。鴻鵠翔九霄，邈然不可攀。

豫章長千仞，挺生崇崖陰。布葉連青雲，交柯蔽層岑。結根豈不固，斤斧將見尋。有柏生石間，屈曲叢灌林。古根齧飛溜，電火焚中心。大不中梁柱，小不堪瑟琴。風霜自搖落，偃蹇獨至今。

流水千百折，白雲三四峰。上有噴壑泉，下有凌霜松。中有一老人，坐嘯巖間風。素髮垂